

# PM: Disiplin di ladang

KUALA LUMPUR, Khamis — Datuk Seri Dr. Mahathir Mohamad menasihatkan peladang menguruskan ladang mereka dengan cekap dan berdisiplin demi untuk mengeluarkan lebih banyak hasil dan sekaligus meninggikan taraf hidup masing-masing.

Menurut Perdana Menteri, jika ladang-ladang kecil dengan keupayaan pengeluaran terhad diurus dan ditadbir dengan cekap dan tata disiplin, pengeluaran sektor pertanian akan meningkat dan kehidupan peladang bertambah baik.

Nasihat ini terkandung dalam perutusannya sempena Hari Peladang Kebangsaan 1981 di Tanjung Karang, Selangor, mulai Sabtu ini.

## Daya pengeluaran

Tema perayaan Hari Peladang tahun ini ialah 'Peladang Progresif Asas Pemodenan Pertanian'.

Bellau berkata, perayaan tersebut adalah sebagai tanda penghormatan negara terhadap sumbangan peladang dalam pembangunan negara.

Kerajaan Malaysia sebagai sebuah negara pertanian sedang giat melaksanakan pembangunan pertanian. Tumpuan akan diberi kepada peningkatan daya pengeluaran.

Peningkatan daya pengeluaran sektor pertanian memerlukan penggunaan teknologi moden yang sesuai dan 'input' pertanian seperti benih, baja, racun serangga dan lain-lain, tambahnya.

Menurut beliau, dengan penggunaan cara baru itu, hasil pertanian akan meningkat dan pendapatan peladang akan bertambah.

## Akan lumpuh

Sementara itu, Menteri Pertanian, Datuk Abdul Manan Othman dalam perutusan yang sama berkata, tanpa sifat-sifat progresif di kalangan kaum peladang, kemajuan pertanian di negara ini akan terjejas.

"Ini, akan mengakibatkan kehidupan yang mundur dan terhimpit di kalangan masyarakat luar bandar. Malah pembangunan negara di bidang-bidang berkaitan juga akan lumpuh," tambahnya.

Datuk Manan berkata, di bidang pertanian, peladang-peladang progresif tidak teragak-agak menerima segala bentuk ilmu pengetahuan dan teknik moden yang berguna.

Mereka menganggap, segala bentuk ilmu yang berguna adalah sebagai kurnia Allah, jelasnya lagi.